

## SA SCUMISSA\*

de Giampàulu Pisu

- Scumiteus?
- Deu nau ca no fait.
- Scumiteus?

Dd'ia torrau a nai cun faci de disàfiu a Antoni.

– Scumiteus ca arrenèsciu a andai e torrai a Terranoa in d-una dí a autostop?

– Centu éurus po chi bincit sa scumissa.

Aici fut incarrerada un'atra scumissa po mei. Cun Antoni, amigu corali, scumitiaus asuba de ónnia cosa e chistioni.

Candu contànt is disàfius nostus, po chini no si connosciat a incarreru no ddus crediat ma is amigus ge-i ddu scidiant ita arratza de scuscentziaus fiaus. In scola fiaus connotus po cudda brulla chi nd'iat fueddau po finas su giornali. Ma no iap' ai mai crétiu de mi depi arrepentiri de cussu giogu furriau a arrori. Candu atressiaus is passadítzius de scola, bidellus e professoris si furriànt po si indidai a-i scusi a is collegas nous, nosu ge si nd'acatiaus a su própiu.

In scola ddui fut unu bidellu chi narànt ca fut unu pagheddu macocu, unu *maniacu*. Fut sempri inguni parau candu passànt is piciocheddas, e bortas medas ddas poniat in fatu. Sa genti naràt ca bessiat a su noti a cassai canis e pisitus po ddus bociri e imbrassamai e ca in domu sua ndi teniat unus cantu totu arringheraus a unu muru. Su chi iat postu in giru custa boxi avatu de unu pagheddu de tempus nant ca fut sparéssiu: no dd'iant prus agata e nisciunus nd'iat scípiu prus nudda...

Ómini mannàciu, de contomaxu mannu, sempri unu pagheddu sudau, cun d-unu fragu de umidadi chi arregordàt sa folla pudescendu asuta de is matas de una tupa in s'atóngiu. A nasu mannu unu pagheddu acancarronau che su de unu stori, sa bisura puru dexiat a sa boxi arrungiosa, aspa e schilitosa. Portàt sempri ullieras nieddas chi ddu fadiant assimbillai a unu boss de sa malavida. No fut po de badas chi ddus portàt: cuànt un'ogu de imbirdiu chi castiàt sempri ananti, firmu. Fut cuss'ogu chi dd'iat fatu guadangiai su logu de traballu. Ma fut s'atru ogu su chi atrudiat e poniat timoria: una ballina niedda sena de pipia, sena de luxi, si *intzertàt* unu maliori sena de fini, che su sperefundu de una funtana, niedda, a crontas bàscias, pronta a nc'ingurti abramida vidas notzentis.

Fut própiu una scumissa po chi iat a essi stétiu bonu a ddi fai abortzai una studenti chi iat fatu binci a Antoni centu éurus e perdi su traballu a su bidellu po *atus oscenus* e tentau sfloramentu. E fut po-i custu chi su bidellu airau iat giurau de si vengai torrendusi sa fúrria fadendusí prangi làmbrigas de surrúngiu.

Atra borta Antoni, sempri po scumissa fut arrenésciu a fai sciundi su predi in d-una dí de ierru, candu a missa incarrerada iat scopiau una bomba fumiosa, agoa iat tzerriau:

– Agitóriu, agitóriu est pighendu fogu sa crésia, totus a foras!

Aici mancai proi proi totus fiant curtus a foras che puddas curruladas de margiani, sciundendusí cola cola, cun su portali de crésia fúmia fúmia.

Po fai biri di essi arrenésciu in *sa balentia* mi depia ingolli sa màchina fotogràfica e tirai una fotografia, cun mei a giornali de sa dí in manus ananti de Municípiu. Po binci depia partiri e torrai a ora de luxi.

Sa dí stabilida, a is otu de mengianu, cun d-una pariga de éurus sceti in busciaca e a màchina fotogràfica seu a s'oru de sa 131 a didu parau. Una màchina arrúbia, una croma noba si firmat pagu ora infatu. Incarrèrat aici su biaxi chi mi nci pòrtat finas a Aristanis, est a inní chi su rapresentanti de profumus est andendu a traballai po fai su girixeddu de is profumerias. Unu fragu forti no definiu aciúpat sa vetura e acumpàgiat is pagu chistionis chi si faint cun genti chi no si connoscit, tanti po

nci passai s'ora. Est sa scoada de s'ieru, sa dí est bella luxosa manca frida. Oru oru de sa bia su biancori de sa cilixia cuncòrdat sa coreta e su campidanu si sterrit ananti nostu. Passaus is cúcurus e coddus de marmidda chi arregòrdant is titas de una fémina, arribaus apustis a su sartu serrau de is montis de Mragaxori a una parti e prus ainnantis ancora, de stanis e mari a s'atra. Is terras traballadas cun is atzas de is surcus funt che línguas sididas arringheradas s'una avatu de s'atra pedendu àcua chi su sciutori de s'annada po imoi at dennegau. Is coddus, cun calincunu nuraxi acuguciau, anca is araus no funt ancora arrenéscius a poni is farrancas, s'intrevèrant a su logu paris de campidanu arregordendusí ca seus in Sardínnia.

De Aristanis finas a Abbasanta una màchina manna mi ndi líat, innoi sa castiada múdat cun tallus de brebeis e feurra meris de su sartu totu cungiau a muru a bullu. Su sartu incarrèrat a si movi e ndi calu ca seu acanta e in cumpangia de su nuraxi Losa chi càstiat de unus cantu millannus su tressígiu de is óminis afateriaus. A s'ingruxadura po Núgoro arribu faci a mesudí. Tradu, chi sighit aici apu a perdi sa scumissa. Inní no pàssat nemus, manca su soli su frius íntrat in is ossus passendu su giubotu. Su bentixeddu lébiu a bellu a bellu si fúrriat a araxi mala chi mi fait pistai is peis a terra po mi scadrigiai. Una màchina manna niedda pàssat a bellu a bellu. Is fentaneddas funt serradas e scuréssias, nci pàssat e fatu unus cantu metrus si fírmat po torrai a partiri, dudosu, avatu de calincunu segundu, fadendumí teni un'àrviu malu, unu sentidu chi no arrenésciu a cumprendi...

Avatu de pagu ora po bona sorti unu tziu de unus sessant'annus a conca spinniada ma amistadosu mi nci acàbat de portai deretu a Terranoa. Fiat ora! Passau su biadotu a su tretu de Pàsada is montis àrbus a manu manca scorrovonaus màrcant s'intrada in Gaddura. Su tziu, unu pagheddu ciaciarroni, preferit a passai po Santu Tiadoru, pígat sa bia secundària a duas corsias ca no tenit pressi, ddi praxit su sartu e sa mirada de is biddas chi s'incàrant cun is domus bellixeddas a pe' parti de s'arruga. Is stanis a manu dereta amòstant calincunu piscixeddu fadendu s'intra e bessi in s'àcua.

A sa una de meigama seu ananti de municípiu a giornali in manus. Unu Terranoesu s'amòstat prexau de tirai sa fotografia chi ballit sa scumissa. Apustis de pagu ora seu papendu unu buconi a lestru a lestru in d-unu tzilleri inguni acanta. Sétziu ananti de sa birdiera aparessit torra cussa chi mi parrit sa màchina niedda de a primu, sempri a bellu a bellu, che unu crobu chi furriòtat circhendu cosa de papai. E cuddu sentidu légiu mi tòrrat fadendumí impriutziri...

A is duas seu torra in sa bia po torrai a domu. A is cinu e mesu scurígat. Sceti tres oras de luxi. Est tradu.

Su scuncordai de su tempus sciúsciat s'antena bona po sa scumissa mesu binta. Is nuis nieddas totu a una borta coberrint su celu amaletzendu una strasura mala e che unu cuguddu de prumu scurígant su merí. Sa màchina chi mi nci acumpàngiat po mi nci portai finas a s'ingruxadura de Thiniscole s'est firmada pagu innantis de un'atra màchina a colori murenu... Funt giai is cinu de a mericeddu, est scurighendu, s'úrtime lugori de sa dí cun su speru de aproliai a domu a luxi nci pàssat cun is úrtimas veturas chi tirant a deretu. Incarrèrat a proi, a primu calincunu stiddiu e agoa sempri prus a forti, su k-way ingortu, asuba de su giubotu m'apígat foras de cambas e peis chi in pagu ora funt totu sciustus. Lampus e tronus arretrònant e assachitànt scutullendu sa terra. No ddu at logu perunu po s'apigai. Su bentu súlat frusiendu arrenegau, proit a stracia mala fadendu intrai s'àcua in dónnia logu. In pag'ora seu che una spòngia aciupada de àcua e su frius mi fait intendi che tzinniga in logu de arriu currendu. In sa bia, nemus... Su scurigadroxu nc'ingurtit dónnia cosa e sceti su tzacai de is lampus allúxiat su nieddori de mericeddu amostendu una muralla de àcua craca portada sciàmia sciàmia de su bentu fridu disapiadau. Sa bidda est tropu atesu po ddoi podi arribai a pei cun custu tempus. Calincuna domu o apigu in su sartu... mancu a ddu pensai, sa temporada at abenau dónnia logu, su sartu est una lutzaina prena de corropus mannus de àcua bruta e sceti su lampaluxi de is lampus allúmiat a lampiadas su scuriori. Sa scumissa est pèrdia, tòcat a tzerriai a calincunu po beni a mi ndi liai e mi sarvai de cust'inferru de àcua e bentu estu fridu.

Incrubau palas a bentu, cun su telefuneddu provu a tzerriai a babu, ma própriu candu seu acabendu de fai su númeru unu sonu de motori mi fai furriai spantau po su prexu. Sena de abarraí pensa e torra curru conca a sa màchina, aberru su portellu e a lestru serru in foras s'àcua e sa frúsia de su

bentu. Unu tebidori m'arricit callentendumí luegus ànima e corpus. Primu ancora de mi furriai faci a su sciaferru, is càrigas càssant unu fragu giai connotu fadendumí stroci su bruncu. Primu ancora chi su ciorbeddu cumprennat, cudd'arviu malu ... Cuddu fragu de ladàmini, de folla bècia pudescendu amesturau a unu druciori abrauci de petza mesu axeda. E candu mi fúrriu de strèmpiu a castiai in faci su sciaferru po pagu no mi càlat guta. De apalas de is ullieras nieddas un'arrisixeddu befianu e cumpraxu cuncòrdat sa priuxa lègia de su bidellu chi duus annus innantis nc'iaus fatu bogai e cun sa manu dereta mi púntat una pistola contras. No acudu ni a nai nudda ni a m'arrepentiri de su sbàlliu mannu di essi sètziu ca unu corpu a conca arrabiosu de màniga de s'arma firmat dónnia pensamentu e unu pillu nieddu mi càlat in ogus.

Solu... imboddiau de scuriu, a bellu a belu aberru is ogus e una punta a conca mi lasset mesu dismaiau e sena de sulidu. Provu a mi movi ma po de badas. Su pitziori de manus e peis acapiaus a-i strintu mi tòrrant is úrtimus arregordus. Sciustu, scavulau in terra che unu tzàpulu bèciu, totu s'arriori de sa cundizioni mala si pàrat crara ananti. Sa buca est tupada cun d-una tira de nastro po imboddiai pacus. At acabau de proi ma su bentu sighit a sulai arrabiosu. Su tempus parrit chi si siat firmau fadendu cresci s'axiu chi a tretus mi fait a amachiadura. Sceti avatu de no sciu cantu tempus su sercuestadori, maraditu siat, aberrit s'enna totu arrogada pesendu unu cuaddu de prúinu. Un'atza de luxi amòstat su logu abandonau totu brutu, cun sa napa chi cuncòrdat is furrungonis. Sa boxi sarragada connota mi salúdat cun amigàntzia frassa, cun cuddu fragu chi mi fait beni furriamentus de stògumu e chi mi fait a timi po no abarrau allupau po mori de sa buca tupada.

– Pensàst ca mi ndi fia scarésciu de tui? Deu apoderu sempri is promissas. Seu unus cantu mesis billendu a tui e a s'amighixeddu cosa tua. Imoi tòcat a tui, ogoa eus a pensai a... Antonixeddu...berus?

– Nàrat fingendu de no s'arregordai de su nòmini. E sighendu:

– No ti pighist pensamentu, apu pensau a dónnia cosa. Imoi scumitu deu ca no intzertat ita totu as a trumentai: ti potzu sceti nai ca at a essi milla bortas peus de su chi eis fatu passai a mei. Una brulla mi fais un'ogu ti ndi bogu...

S'ogu bellu studau dónnia tanti s'alluit de una luxi de machímini amostendu una tírria smesurada chi mi prenit su coru de arriori e mi fait prangi de disisperu po is iscumissas maraditas.

– Imoi mi ndi depu andai. Ge-i torru, tui tanti no bandas a logu perunu.

Seu torra solu cun s'axiu miu a murigai is pensamentus malus. No fait a abarrau ni sètziu ni crocau, is sogas mi nc'intrant in sa carri e unu sidi arrabiosu m'acàbat de trumentai. In cumpangia de su scuriu su tempus parrit chi no passit mai. Ma su tempus si ndi frígat de is acotéssius de is óminis e de sa malasorti mia e sighit su giru suu.

No sciu prus ita pensai. Is oras totu ugualis. Candu creu de mi podi amachiai unu stragatzu sighiu de unu tzérriu a boxi manna sègat sa mudesa de su logu.

– Non b'est niunu innoghe?

A-i cussa boxi una luxi de speru mi fait stremessiri po su prexu. No potzu arrespundi ma provu a assachitai e pistai is peis a terra po fai torrocu.

A bellu a bellu si scaringiat s'enna e una faci de piciocheddu de unus doxi, cuíndixi annus s'incàrat dudosu. Cumentu mi bit currit a mi scapiai e cun s'arrasoja sègat speddiu is acàpius. Bogau su bavàlliu dd'imprassu prangendu e assungutendu.

– Apo bido una cosa rara sa note passada e apo pensado de bènnere a abbaidare.

– Gràtzias – acudu sceti a musciai. A lestru a lestru ddi contu is acotéssius de is úrtimas oras e si fueus de cussa presoni maradita.

Est a mengianeddu. Su bentu s'est citiu. Una nébida callada imbóddiat dónnia cosa fadendusí andai a incarreru a s'apràpidu. Depeus agatai a lestru unu telèfunu po tzerriai a is carabinieri. Bustianu cun pagus fueddus mi nàrat de ddu sighiri e de poni is peis anca ddus ponit issu ca su logu est prenu de foradas fundudas perigulosas chi sa temporada de is diis innantis at prenu de àcua. Unu cani biancu mannu, su de su pastori, si sighit passu passu. Seu débili mancai apretu e timoria mi fatzant movi a lestru is cambas cancaradas.

Unu sonu de màchina e de enna atzapulada sighiu de frastimus si faint furriai palas. Passus lestrus si

ponint in fatu. S'at scobertu! S'arrastu de is peis in su ludu! No at a abarra meda a si sighiri. Su disisperu mi fait allonghiai su passu mancai mesu scianca scianca.

– Ajó ajó – mi nàrat Bustianu, strumbullendumí a curri. Unu sparau si fait tremi paris ma no si firmaus; no si podit ai ancora biu. Sa nébida callada si cúat mancai ancora po pagu. Is peis aintru de sa lutzaina s'ant a fai perdi is sinnus de stravíngiu. Is passus sempri prus acanta e un'atru sparau si fait firmai apalas de unu coróngiu, a su costau de una forada manna. Su piciocheddu cun d-unu acinnu mi fait sinnu de mi citiri. Assodit una perda chi ddi prenit su buciconi e abetaus cun su coru amarteddendu cuaus de s'arroca cun sa nébida chi fait surreali su logu, is coróngius parrint duennas gosendí su spetàculu.

– Firmus ingunis!

De apalas sa boxi arrungiosa si fait stremessiri lassendusí chena de unu stíddiu de sànguni e luegus una scrantexada mi nci scàvulat a terra fadenduminci arrui tuvi tuvi, su sànguni druci a sabori de metallu mi prenit sa buca. Bustianu pròvat a si furriai ma una scofada de pei ddu fait arrumbulai a una parti e pinnicai in ddus po su dolori. Própiu insaras su cani nci ddi sàrtat asuba afrachendiddu. S'impéllida nci ddu fait arrui aintru de cussu corropu de àcua a colori de terra. Su cani lestru ndi tòrrat anadendu a s'oru de sa forada.

– No sciu anadai, agiudaimí, agitóriu! – Is itzérius de disisperu arretúmbant in custu logu de pantàsimas. Ddu castiaus firmus atzuvencinci a bellu a bellu atrotoxendu e atzapulendu manus e peis in s'àcua cun cussu ogu disapiedau pedendu agiudu finas a sparesi, ingúrtiu.

Su bidellu dónnia tanti a su noti benit a mi bisitai cun cussu ogu allutu de machímini postu a un'atza de cussa faci groga che sa cera ammoddiada de acua che sa brenti de unu pistilloni. Su grisú mi fait tremi che sa canna. Cussus arregordus arrosos mi tòrrant in sonnus scidendumindi assustrau. Apu sacramentau, de sa dí s'única scumissa chi apu fatu est cussa de no scumiti mai prus.

Est própiu berus ca cun macus e cun santus no fait a brullai.

*\* Contu bincidori de su segundu prèmiu in su cuncursu literàriu 'Anselmo Spiga' 2008 de Santu Sparau (CA).*